

Llŷr Gruffydd AC
Cadeirydd y Pwyllgor Cyllid
Cynulliad Cenedlaethol Cymru
Tŷ Hywel
Bae Caerdydd
CF99 1NA

31 Ionawr 2019

Annwyl Llŷr,

Cynigion ar gyfer cyllideb flynyddol cyrff a ariennir yn uniongyrchol

Rwyf yn ysgrifennu mewn ymateb i'ch llythyr dyddiedig 14 Ionawr 2019, lle rydych yn datgan y byddech yn croesawu barn y Comisiwn ar y cyfeiriad a'r canllawiau y mae'r Pwyllgor Cyllid yn eu rhoi i gyrff a ariennir yn uniongyrchol wrth lunio amcangyfrifon yn y dyfodol.

Mae'r Comisiwn yn cytuno ag argymhelliad blaenorol y Pwyllgor na ddylai unrhyw gynnydd yng nghyllideb y Comisiwn, ar gyfer y blynyddoedd sy'n weddill o'r Cynulliad hwn, fod yn uwch nag unrhyw newidiadau i Grant Bloc Cymru. Roedd y gyllideb ar gyfer 2019–20, a osodwyd ym mis Tachwedd 2018, yn adlewyrchu'r gofyniad hwn.

Yn ein gohebiaeth â'ch Pwyllgor ym mis Tachwedd 2018, gwnaethom nodi'r canlynol:

*Rydym yn cynnig ein bod yn parhau i fonitro'r cynnydd yng Ngrant Bloc Cymru a sicrhau bod cyllideb **weithredol** y Comisiwn yn cynnyddu yn unol â Grant Bloc Cymru.*

*Mae'r gyllideb **weithredol** yn cynnwys gwariant refeniw (gwariant staff a gwariant nad yw'n ymwneud â staff), gwariant cyfalaf a'r gronfa prosiect newydd.*



Nid yw'r gyllideb weithredol yn cynnwys unrhyw symiau nad ydynt yn arian parod (costau cyllid pensiwn (Gwariant a Reolir yn Flynyddol) a dibrisiant), ac unrhyw gostau sy'n gysylltiedig ag Aelod neu gostau etholiadol (gan gynnwys cyllideb Penderfyniad y Bwrdd Taliadau). Mae'r symiau hyn yn bennaf y tu allan i reolaeth y Comisiwn; gyda chyllideb Gwariant a Reolir yn Flynyddol yn cael ei gosod, yn seiliedig ar gyngor a ddarparwyd gan Adran Actiwari'r Llywodraeth (GAD) a'r Gyllideb Penderfynu yn cael ei gosod gan y Bwrdd Taliadau annibynnol.

Ar hyn o bryd, mae'r Comisiwn yn mynd drwy'r camau cynnar o lunio ei gyllideb ar gyfer 2020–21, a bydd unwaith eto yn awyddus i ystyried newidiadau i Grant Bloc Cymru. Fodd bynnag, mae sgysiau cynnar gyda swyddogion Llywodraeth Cymru wedi nodi efallai na fydd yr amcangyfrifon a ddefnyddiwyd yn ystod 2018, i ganfod y cynnydd posibl yng Ngrant Bloc Cymru, ar gael yn ystod 2019. Bydd angen ymgynghori pellach gyda swyddogion Llywodraeth Cymru yn ystod 2019 er mwyn canfod amcangyfrif rhesymol arall o'r cynnydd posibl yng Ngrant Bloc Cymru ar gyfer 2020–21.

Felly, mae'r Comisiwn yn cytuno gyda'r Pwyllgor o ran ei asesiad sy'n nodi ***"y bydd cysylltu cyllidebau cyrff a ariennir yn uniongyrchol â'r cynnydd yn y grant bloc yn parhau i fod yn broblemus"***.

Os nad yw amcangyfrif o'r newid yng Ngrant Bloc Cymru ar gael, bydd y Comisiwn yn parhau gyda'r dull agored a thryloyw a fabwysiadwyd ar gyfer ei gyllideb yn 2019–20, wrth bennu ei gyllideb ar gyfer 2020–21. Bydd y Comisiwn hefyd yn parhau i ddefnyddio amcanestyniadau chwyddiant (e.e. ffigurau datchwyddydd Trysorlys ei Mawrhydi¹ a gyhoeddwyd) fel pwynt cyfeirio i fesur rhesymoldeb ei gyllideb weithredol.

Yn hanesyddol, mae'r Comisiwn wedi gosod ei gyllideb o amgylch ei nodau strategol, yn seiliedig ar yr adnoddau sydd eu hangen i gyflawni ei ddyletswyddau statudol, fel y dywedais mewn sesiwn dystiolaeth yn eich Pwyllgor ar 5 Hydref 2017:

¹ <https://www.gov.uk/government/statistics/gdp-deflators-at-market-prices-and-money-gdp-december-2018-quarterly-national-accounts>



“Our starting position is always the strategic goals of the Assembly, which you’ll remember from before: providing outstanding parliamentary support to engage with all the people of Wales and champion the Assembly, and, of course, to use resources wisely. We’re also mindful, of course, of the statutory duty of the Commission to provide staff, property and services to do the work that the Assembly has decided it wants to do”.

Os na fydd amcangyfrif rhesymol o'r cynnydd i Grant Bloc Cymru ar gael, credwn y bydd y broses hon yn rhoi sicrwydd i'r Pwyllgor y bydd y Comisiwn yn parhau i lunio ei gyllideb mewn ffordd gadarn a thryloyw, gan ddefnyddio data a gyhoeddwyd gan Drysorlys ei Mawrhydi fel pwynt cyfeirio ar gyfer cynnydd yn ei gyllideb **weithredol**. Rydym yn nodi bod y Pwyllgor, ym mis Hydref 2018, wedi croesawu'r newidiadau a wnaed i gyflwyniad ein dogfen gyllideb ar gyfer 2019–20:

Mae'r Pwyllgor yn credu'n gryf fod y newidiadau yn cyfrannu at dryloywder wrth gyllidebu.

Mae'r Pwyllgor yn croesawu'r ymagwedd a gymerwyd gan y Prif Weithredwr ers ei phenodiad, ac mae'n arbennig o falch â'r agwedd agored a ddangoswyd gan y Prif Weithredwr a'i pharodrwydd i weithio gyda'r Pwyllgor.

Mae'r Comisiwn yn ystyriol o'r pwysau a'r toriadau y mae'r sector cyhoeddus ehangach yn eu hwynebu, mae wedi dangos yn gyson ei ymrwymiad i effeithlonrwydd, effeithiolrwydd a gwerth am arian, ac mae'n sicrhau ei fod yn "defnyddio adnoddau'n ddoeth" fel un o'i amcanion strategol allweddol.

Byddwn bob amser yn ystyried dychwelyd unrhyw danwariant o fewn cyllideb gyffredinol y Comisiwn (fel y gwnaethpwyd gyda thanwariant cyllideb Penderfyniad ym mis Rhagfyr 2018), os byddwn yn dod i'r casgliad na allwn wneud defnydd effeithlon, effeithiol o'r arian sydd ar gael i gyflawni blaenoriaethau'r Comisiwn o fewn y flwyddyn ariannol.

Yn ôl yr arfer, cofiwch roi gwybod os hoffai eich Pwyllgor gael unrhyw wybodaeth bellach.



Yn gywir

Suzy Davies

Suzy Davies

Copi: Comisiynwyr y Cynulliad, Manon Antoniazzi, Nia Morgan

